

桃園市115年語文競賽區複賽臺灣客語朗讀國小組(南四縣腔)

【噓！恬恬聽】劉玉蕉原作

「噓！恬恬……，你等聽，有麼个聲音？」課上到一半，先生停下來，偃个天才先生又愛變古怪咗！

「隔壁先生个聲音大啊像響雷公！」「低年級讀書个聲音蓋好聽！」「有蟬仔叫个聲音！」……。「鳴～～」教室肅恬，空氣結冰，同學儕儕像樹頭仔人樣仔，眼呆呆仔、嘴勺勺仔……，先生笑咪咪仔緊看偃等，課繼續上，今晡日佢愛紹介个就係「東勢舊山線」。

「鳴～～」空氣裡背又傳來舊式老火車个聲說，先生講：「你等恸得著頭擺火車衝火煙个情景無？」係哦！對老一輩个東勢人來講，該聲說、該散在田坵、山園、河壩个白煙，係親切乜係燒暖个。藍色个火車頭每日拖等四、五節車箱，朝晨頭同大雪山山背个日頭比早，臨暗加上西片紅霞个光，像蛇哥樣仔定定仔穿過田坵對中。「確樂、確樂～～」「火車來咗啲！」做田事个大人探頭看，細人仔同火車走相逐，連火車路脣个花草草乜領頭相借問，火車「鳴～～」一聲，同佢等講「正來寮」，再嘍一口煙就攞手離開。

「恁早！」人潮像沙連河个魚苗樣仔，每日準時準點對火車頭个大門行出行入。朝晨、臨暗坐火車个人過多，無影響清風吹入車廂肚裡个清閒，窗仔搥上去，外背个好景色就對眼前咻啊過，田坵跔四季變化，每日坐火車个人定著會有體會。臥起頭那係遠遠近近个青山，一座接一座，厥好朋友，係拗厥頸根、插厥腰仔个白雲，好天時、壞天時，都有佢等表現感情个方式。

「鳴～～」愛過河壩咗！大甲河在腳下，激起一層又一層个浪花，帶來一聲連一聲个嘍嘍，出豐原个人客會收著厥个「加油」；歸東勢个人客會接著佢該聲「辛苦咗啲！」每日無變。這兜好景色，一直到火車頭廢核、鐵路拆核，都還深深刻在老輩東勢人个頭腦裡背。

「鳴～～」今這下一日兩枋个細火車，係東勢客家園區照等早期東勢線个老火車，跔舊月臺脣設个遊寮場。先生講該聲音、形款同原旦个嘍煙火車有相像，毋過，坐過分人鼻公空烏核个老式火車，這照樣式做个搞寮細火車，正迂兩轉，哪會過願！

桃園市115年語文競賽區複賽臺灣客語朗讀國小組(南四縣腔)

【去看阿公阿婆】胡明華原作

愛歸去看阿公阿婆也，歸家人都蓋暢。前一暗晡阿爸阿媽緊吩咐阿立愛早早起，做毋得勒床。因為阿公阿婆歇啊山林壁角，阿立一家人愛坐火車盤兩到車仔，再行十過分鐘正會到，係講忒晝正出發，連食夜都可能赴毋著。

阿立盡好珍阿公去屋脣个樹林扭蟲仔搞，書項有教个蟲仔，差毋多每一個都尋得著。虐毛蟲、草蟻仔、透屎公、揚蝶仔、揚尾仔、花菇仔，愛尋毋驚尋無。

阿婆蓋惜阿立，見擺阿立歸來，佢就會跔跔做粢粢仔分這個心肝仔嘗，粢粢仔就係佢兩子阿婆个秘密。阿婆毋知哪來个本事，總係揣得著這個心肝孫仔好搞麼个東西，兩儕總會聘好下二擺阿婆愛送阿立麼个好搞个東西，阿立就恁仔望等兩子阿婆過再見面。

無想著，阿立這擺歸去，正知阿公前一駁仔行路無細義橫斷腳骨，這下愛怙杖仔正做得停動，連行都毋方便也。阿婆乜手著傷，歸隻手包等藥膏，莫講入灶下做粢粢仔，連自家食東西都蓋難。

阿公阿婆無法度陪等搞也，阿立測著蓋失望，一路翻山過嶺來尋阿公阿婆搞，結果嘎變恁仔。佢儘採問¹過人，就面臭臭仔屏入間房，無聲無氣譴腔闕腸²，緊想緊毋甘願。

臨暗个時節，阿爸阿媽同阿立喊出房間，毋曾等阿立開嘴，阿爸塞分佢一隻袋仔。阿立打開來看，裡背係佢望也盡久个變形金剛，這擺做得展寶分同學看也。

「你知道這係阿婆手著傷過後跔跔下山去買分你个無？」阿媽講。「吓？」阿立嚇著一下，想著自家毋掏阿婆个態度，感覺蓋見笑。

續下來，阿爸又拿出一隻畜蟲仔用个盒仔，裡背還有一隻透屎公。阿立看也壞勢啊面紅濟借，頭犁犁仔細細聲問：「係阿公抑係阿婆買个？」阿爸講：「阿婆買个盒仔，若公自家扭个透屎公！」

阿立緊想緊測著自家蓋毋知事，佢恸著阿公阿婆恁惜自家，著傷也還想著愛準備分自家个東西。顛倒係佢，淨顧自家，完全無想著去關心阿公阿婆著傷也幾艱苦。佢這下分醒也，決定無愛做一個毋知人我个細孬仔，黏時就去同阿公阿婆會失禮，順續仔使妮一下，佢想：「麼人喚阿公阿婆恁惜佢呢？」

¹ 問：音 mun；此指對人打招呼。

² 譴腔闕腸：音 kien` zii` ad` cong~；形容氣呼呼的樣子。

桃園市115年語文競賽區複賽臺灣客語朗讀國小組(南四縣腔)

【上場】徐佳妤原作

「防守、防守、防守……大火鑊來吔！」「三分線，咻！擲入去吔，好球，哈哈，蓋壁！」佢蓋享受看籃球比賽，因為做得盡命牯大聲喊，所有個煩惱黏時就毋見核吔。

記得小學四年生，該時節林書豪帶領紐約尼克隊連等得著好成绩，全世界都對佢蓋入迷。因為受著這陣皺螺風個影響，五年生佢決定去考籃球體育班。恁好彩，分佢考著吔，無想著嘎係清苦個開始。每朝晨七點半愛到學校訓練兩點鐘，放學過後，還愛再練點半鐘；練核，全班還愛在教室寫核功課正做得歸去。最尾練啊每一個人，走運動坪十過圈都係小可事。因為有同學讓陣¹，還有自家對籃球個熱情，佢毋識喊癢過。

見係²有比賽，爺哀總會蓋無閒，準備食個、翕相仔搭錄影、做啦啦隊，三不時還愛駛車仔載佢等去比賽，屋下人個支持就係球員最大個力量。爺哀看著佢在球場項有好個表現，都會緊拍手；係球仔分人抓走³吔，都蓋緊張，會在脣口安慰講：「毋怕，

¹ 讓陣：音 ngiong ciin；做伴。

² 見係：音 gian he；每一次、只要是。

³ 抓走：音 sa' zeu`；籃球術語，此指「抄到球」。

再一擺。」一場比賽下來，大家都走啊氣又氣吭⁴、汗流脈落，愛目珠跔好球仔、接好球仔、擲入籃框裡背；係無打好，轉擺⁵個時節就會分教練喝：「你等愛保護球仔，莫惹惹分人抓走啊，愛走位擋人……。」大家緊掙汗緊淋水，凝神恬恬聽，毋敢啟大氣。

打球仔，手腳難免會著傷，有時節無堵好，膝頭會撞著、腳會跔著、腳盤分人蹬著，臃血、烏青、勾筋係平常個。佢毋驚看醫生做復健，就驚忒傷重抑係功課無寫核，教練毋分佢上場，淨做得坐凳板，該時節心肚裡個毋甘願比訓練還過苦哦。

小學個籃球生活，分佢無時間上網搞遊戲，毋單淨功課進步吔，身體變啊蓋砸礮，乜學習著仰仔同人合作，正經體會著這句話：「贏球莫沙鼻，輸球莫失志。」無論輸贏，都分佢成長蓋多。

⁴ 氣又氣吭：音 hi ca' hi hong`；上氣不接下氣。

⁵ 轉擺：音 zon` bai`；休息。